



24. april 2007

Inatsisartut Ingerlatsinermut Inatsisaanni § 36 stk. 1 malillugu imaattumik Naalakkersuisunut apeq-quteqaateqarpunga:

Naalakkersuisunut apeqquteqaat Naalakkersuisut Inatsisartut Kultureqarnermut, Ilinniarti-taanermut, Ilisimatusarnermut Ilageeqarnermullu Ataatsimiititaannut tusagassiutitigut aki-sussaaqataanermut Inatsisartut inatsisissaattut siunnersuummut paasisutissiissutaat pillugu. (Inatsisartunut ilaasortaq Jens B. Frederiksen, Demokraatit)

Tunggavigineqartoq:

Nalinginnaavoq Inatsisartut ataatsimiititaasa Naalakkersuisut inatsissatut siunnersuutaat suliaritillu-gu tusarniaasimanermi Naalakkersuisut akissutisiarisimasaasa assilineqarnerat tunniunneqartarluni.

Tusagassiutitigut akisussaaqataanermut inatsisartut inatsisissaattut siunnersuutip suliarineranut ata-sumik Inatsisartut Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaa pisortaqarfimmiit (KIIP) tusarniaanermi akissutaasimasunik arlaqaqisunik 16. marts pissarsimmat.

Sapaatit akunneri pingasut missiliorlugit qaangiuttut ataatsimiititamut ilaasortat ilaat ataaseq tusa-gaqarsimavoq suli tusarniaanermi akissutaasimasunik allamik peqartoq, tassalu nunatsinni eqqar-tuussisuunerup Kalaallit Nunaanni Tusagassiateqarnermut Ataatsimiititap tusarniaanermut akissuti-gisimasaannik. Ataatsimiititap KIIP qinnuigisimavaa taama tusatsiagaqarneq ilumoonersaq ilu-muunnginnersorluunntiit, taamaattoqarsimappallu assilineri ataatsimiititamut nassiateqqullugit.

Tusarniaanermut akissutaasimasut aqaguani erninnaq nasssiunneqarput, taakkunanilu takuneqar-sinnaavoq inatsisissatut siunnersuut pingaarutilitsigut qularnartoqartitaasoq.

Pissutsit imaapput, inatsisissatut siunnersuutip isumaliutissiissutitassaata ataatsimiititamiit tunniun-neqarfissaa ullunik pingasuinnarnik sioqqullugu saqqummiunneqarsimallutik, tamatumalu kingune-raa siunnersuutip aappassaaneerreqarnissaa ukiamut ataatsimiinnissamut ataatsimiititamiit qinnuti-gineqartariaqarsimammat.

Naalakkersuisut eqqartuussisuunerup naliliineranut isumaqaasimagaluarpata isumaqataasimanngik-kaluarpataluunniit ataatsimiititap piumasaqaatigisussaavaa tusarniaanermut akissutinik taamaattunik pigisaqartoqartoq imaanillu paasitinneqartariaqarluni, pingaartumik tusarniaanermi akissutaasut inatsissatut siunnersuutip qularnassusianik apeqquusiisimappata.

Ataatsimiititami uppersivarput KIIP-ip tusarniaanermut akissutit 29. marts-imiilli, tassa sapaatit akunnerini marlunni, pigereersimagaat, nammineerlutillu ataatsimiititamut ilisimatitsissutigisima-nagit.

Tamanna aallaavigalugu Naalakkersuisut qinnuigissavakka pissutaasoq nassuiaqqullugu.

Apeqqut akeqquneqarpoq ullut suliffiusut qulit qaangiutsinnagit.